

113 年全國語文競賽原住民族語朗讀 【拉阿魯哇語】 國小學生組 編號 3 號

macarum siarataisa

hliholumia mahlicaliva cucu'una, ma kani'i hlicalivana pi hlitakumacua  
hlisasangaru, maru mumua kuhlitakumacua luu' u. aucaucani hlisasangara  
ihlaisesa takuunganua aucaucani lu'u ihlaisesa kiapuhlua siatatarata.

muluhlu ihlata aariaari arataisa, aralangulungulu. uamia sala'a  
ahliacuvungana aralangulungulu, hliarukararamangu ka tumu. ucanika  
pautuamacuaku, uka'a kupatapauhla caalu, uka'a kuualava sala'a.

maiusupu, marapihli varu'u siangusipa; matakalala marapihli siarataisa,  
siarataisana sitakualangulungulu, mavacangua siasumiaku, ucaniika apasapa  
kuavacangulu; mucua mavacanguisa ia mucukuhluaku mahlukua kani'i  
sasarua, kuavacanguisa uka'a macuisa tukucuku.

kiariari hlitarutuahluaku cacihli masalangusangu mamaini ahlaina,  
marapihliakuisana pakikucu, ucaniika kutalakakukua ihlku, pasamia kana'a  
tamuucu takulaicu tikiku. marua cucu'i kihlahlamu ihlaku “ maci  
kuariatarauhla tukulu, kucikia pakarangatulu, uananaia maiakaka takacacihli. ”  
kani'i mrakakacuaku. pausu'ulu takacacihli uka'a sitahlamiamia  
uvurapasamia, maruacucu'u amihla umahlukua kani'ina marahlicalivau  
mi'arahlasu takuliacutukulu rianu masiangusipaul.

macahliaku kani'i hliparakaka tukuna, pi siaucaniisa siangusipina,  
macahliaku sipalavaluna kuucani siarataisa, marua siasasangaru marua luu'  
ulu, siangusipa iniciki pi mavacangulu, umaruamia hlicaliva siangusipana,  
tumamahlungulu sisasangaru.

kukia atuhlungulu kariisa cucu'u, ausi hlihlikuaisa ihlau ahla  
hlialivaluaisa ihlau, cucu'ua pisipatuhluhlakia, umahlukua takacacihli  
mii,maci aunani ia tuahlu pihlipalava,tuahluaku maritalaahla, cucumacuisa  
macahlia ihlauna kupautuamacu ihlau.

ucani siangusipa cucu'una pisitakuaili macarumu, macarumu  
sipatakalala, macarumu siarataisa, kani'i macarumu masiangusipana,  
marasihlungulu siangusipa cucu'u. maci cucuari tuahlu pakiturulu hlicaliva, ma  
kana'a macarumu mavacangulu tukucuna.

## 成長的痛

成長是每個人必須經歷的過程，過程有成功的快樂，也有失敗的淚水。每一次的歡樂，是正能量、每一次的淚水，是悲傷的宣洩

隨著一天天的成長，也越來越艱難。前面的道路充滿了坎坷，也佈滿了荊棘，但是我堅信，沒有翻不過的山，沒有走不完的路。

破滅，為了新生；破繭，為了成長；成長是痛苦的，我是幸運的，但也不幸；幸運的是我來到這個世界，不幸的是，我沒有真正的朋友。

我以前遇到一個非常美麗的女孩，我為她付出全部，可是她無動於衷，那時我的心非常的痛。有人說：「這些會變成你的歷程，痛苦、傷心，都是你生命的養分」。

我知道這些痛苦，會成為生命的一部分，改變給予我們的不僅是成長，有歡笑也有淚水，生命才有豐富多彩，讓我們用經歷豐富人生，創造快樂。

不要在意別人怎麼說，真正懂你的人絕不會否定你。人的一生是痛的循環，破繭的痛，成長的痛，成長就像是蛻皮。是痛苦，是流血，有風險，有失敗；但也是期待，變得成熟與美麗。

這些痛在人的一生，成為人生活中的光亮。如果以後我可以笑著回憶從前，那一場友誼之痛。